

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 30.8.2012 18.05 Uhr auf 94.0 bzw. 87,7

Moin, leev Toehörers,

dat was lesd Sönnndag 'n stur Spöl van Kickers Emden, um dat tegen de VFL Oyhte mit 2:1 toe winnen. De Gasten harren anfangs mehr van 't Spöl. Man Kickers hung in disse Spöl blot 20 Menüten 'n bietje dör. Dann funnen sük de Jungs vör ruugweg 400 Toekiekers.

För Trainer **Yasin Turan** was dat dit Maal neet eenfach, 'n stark un ingespölte Mannskupp up 't Feld toe brengen. De komplette Achtermannskupp muss he umbauen. De roodspeerte **Christopher Appeldorn** un **Manuel Menzel** fehlten genauso as de verletzte Kaptein **Bernd Grotlüschen**. Un mit **Gökan Batbay** un **Björn Westermann**, de bei noch in Urlaub wassen, fehlten ok noch twee Stammspölers.

Man de Umstelleree hett heel goed henhauen. De Veererkett mit **Marc Boerchers**, **Thilo Janßen**, **Arne Janssen** und **Ralf Ludwigs** spölten – sovöl langer dat Spöl dürte – immer beter.

Oyhte versöchte dat anfangs immer weer mit lang Ballen. Sükse Ballen sünd ansük eenfach för 'n Achtermannskupp. Man neet för Kickers in de eerst 20 Menüten. Al in de 10. Menüte was dat sowiet. Een Oyhtespöler kunn de Ball wiet van de Siedstreek insmieten. De hele Achtermannskupp van Kickers Emden köppte vörbi. Dorover was **Marc Pallentien** van Oyhte heel blied, kunn he doch de Ball in 'n Nett van Kickers Emden unnerbregen. Emdens Torwart **Renè Carsten** harr keen Kans, de Ball toe hollen.

Dorna harr de jung Kickers Mannskupp mehr Glück as Verstand, so as man seggt, dat se neet mehr Toren rinkregen. Al in de 13. Menüte truffen de Gasten blot de Posten. Man dorna waakte Kickers Emden up. Wenn dat ok of un toe spölerisch neet so leep, man over de Kampf mutt man ja sükse Spölen dreihen, un dat moken de Emders ok.

In de 23. Menüte wurr Kickers Emden dordör belohnt. Da gaff 'n Ecke för Kickers van de rechte Kant. Marco Boerchers skoot disse un an de lang Posten köppte Thilo Janßen de Ball over de Torstreek. Un Kickers bleev an Drücke. **Thilko Boekhoff** un noch maal Thilo Janßen harren dat tweede Tor up Foet, man heel knapp gungen de Ballen an 't Tor vörbi.

In de 40. Menüte hull **Carlos Santos da Luz**, de bi dat Tor des Monats in de ARD de tweede Platz beleggt hett, eenfach maal drup. Man de Torwart kunn de Ball noch nettekraat noch 'n toe Ecke ofwehren.

Na de Pausentee skoot Oyhte wall 'n Tor, man wall Torwart Carstens behinnert worden was, wurr dat Tor neet geven.

Dorna harr **Martin Habben** in de 65. Menüte 'n heel goed Kans, man de Torwart pareerte de Ball heel klasse.

Gliek dorna skoot Carlos Santos da Luz ut goed 20 Meter de Ball in 't Tor un dat stunn 2:1 för Kickers Emden. In de 73. Menüte harr Kickers dann noch düchtig Glück, as de Spöler **Dennis Jex** all Kickersspöler utspölte un de Ball heel knapp an 't Tor vörbiskoot.

Dorna harr Kickers all paar Menüten Torkans up Torkans. Man de Ball wull neet mehr in 't Tor.

Man ok so freeiten sük all, Spölers, Trainer, Betreuer un de Kickersfans over 3 Punkten.

Saterdag um Klock 6 geiht dat nu tegen Blau-Weiß Lohne. Ik hoop, dat 'n Bült Toekiekes in dat Oostfreesland-Stadion komen. Ik tipp up 'n 3:0 Sieg för Kickers Emden.

So nu, as alltied, 'n heel kört Foetballwitz

„Herr Doktor, mi word stadig geel un rood vör Ogen“, klaagt de Foetballer. „Wesseln Se mal de Schiedsrichter“, meent de Doktor.

.
Leev Toehörers van Radio Oostfreesland,
dat was dat weer maal för disse Week,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.
Bit anner Maal
Joe
Erich Bolinius
ut Emden-Petjem.